

Oz ei Numnasontga ni il Di dallas olmas



NOVEMBER


Numnasontga ed il Di dallas olmas

Ils biars dis specials dat ei per far attent ad enzatgei viv sco per exempel il Di dil gat ni il Di dil tgaun. Igl 1. ed ils 2 da november ei quei empau auter, quels dis seregurdein nus da tut ils cars carstgauns ch'eiin gia morts. Numnasontga, igl 1. da november ei in di religius dalla Baselia catolica per festivar e patertgar a tut ils sogns. Perquei che quei di ei era in firau e certas personas han liber, van ellas beinduras gia quei di sin santeri per visitar las fossas da parents ni d'amitgas e d'amitgs ch'eiin gia morts. Ella religiun cristiana crein ins ch'ils carstgauns hagian in'olma, ch'els seigien pia dapli ch'in tgierp. L'olma ei quei che fa unica mintga persuna, co ella senta e patratga. El cristianissem crein ins che l'olma mondi enta parvis, cura ch'in carstgaun miera. Perquei ei ils 2 da november il «Di dallas olmas» e lu, ni gia il di avon, mettan ins flurs ni candeilas sin la fossa dad ina persuna morta. Quella tradiziun dil seregurdar dils morts e da lur olmas dat ei en bia outras tiaras sin quest mund. Mo igl ei buca dapertut enzatgei trest. El Mexico per exempel ha quei di num

Has ti gia udiu dil
«Di dallas olmas» ni dil
«Día de los Muertos»?


«Día de los Muertos» ed igl ei in di da fiasta plein colurs. Las Mexicanas ed ils Mexicans crein ch'ils morts re-tuornien quei di a casa per visitar lur famiglias. Perquei decoreschan els las casas e las fossas cun flurs da pupi en tuttas colurs. Ei dat dultscharias en fuorma da cavazzas ni skelets ed ils carstgauns rin, saultan e raquentan dallas personas ch'eiin mortas.

Per las Mexicanas ed ils Mexicans ei la mort buc enzatgei sgarscheivel, mobein ina part dalla veta. Perquei festiveschan els il Di dils morts ni il Di dallas olmas sco gronda fiasta plein legria.



Ideas per seregurdar e render honor als morts

1



Fai in bi maletg
cun colurs d'aua.

Mira in album da fotografias vegl, nua
che ti anflas fotografias dallas persunas
ch'ei buca pli tier nus.

Scriva ina carta ni ina poesia.

Raquenta ad enzatgi da tia famiglia
ch'ei pli giuvens che ti dad in parent che
viva buca pli.


Fai in dessert ni enzatgei auter da magliar
che la persuna morta haveva bugen ni
che s'auda tier vossa tradiziun da famiglia.

Fai ina viseta sin santeri

2

Eis ti gia stada ni staus ina ga sin santeri? In santeri ei in liug special. Ins di ch'ils morts anflien cheu lur ruaus, perquei eis ei da star fetg quiets sin santeri. Quei ha da far era cun il respect visavi ils confamigliars ed amitgs che visetan las

fossas. Ti vegns a sentir – sin santeri regia in'atmosfera fetg speciala. Ins sto buc haver tema, mo tuttina eis ei meglier da visitar in santeri ensemen cun ina persuna carschida. Cun quella sas ti discutir las damondas sutvart e tut quei che vegn endamen a ti en connex cun il tema veta e mort durant vossa viseta sin santeri.



Dat ei ina fossa dad in parent sin il santeri?

Enquera la pli biala fossa sin il santeri.

Mira las datas sin ils craps-fossa. Cura ein las persunas naschidas? Cura ein ellas mortas?

Tgei creis ti: Co han ellas viviu?

Decorescha ina candeila da morts

3

Ti drovas:

- ina candeila da morts senza decoraziuns
- colurs per malegiar sin veider ni fleters permanents
- taccaders permanents
- auter material da decoraziun sco pindels da colur, curals, plemas, etc.

Ponderescha per tgi che ti vul decorar la candeila da morts. Tgeininas eran las colurs preferidas da quella persuna? Ha quella persuna giu in animal da casa ni in hobi special? Malegia enzatgei che va a prau cun la persuna. Fai igl empren ina skizza sin pupi e malegia pér suenter sil cup dalla candeila. Decorescha la candeila cun pindels da colur ni tacca si auter material da decoraziun. Sche ti vul decorar la candeila da morts per ina persuna che ti enconuschevas buc, metta simplamein avon tgei che quella persuna havess saviu haver bugen. Ti sas era malegiar simbols sco cors, steilas ni cruschs.

Porta la candeila sin santeri e plazzescha ella sin fossa.

